

# 1 Timoti

**Polva Timotimba Omnana,  
Yeoa Wohkek Vetho Kristusna  
Nemelmomoa, wo Indhanam  
Nona Numhowol Vevm.**

---

**1** <sup>1-2</sup> Kava Pol, kava Yesus Kristusna moalamangnindrini. Kava hona moamba yem novol vipipramnav, Timoti. Yimba undnahonam Yesus Kristusmba lohmanav, os men kav vevm, wo noinda yemba kava os nengmanav, yimba maim oi, kavna ombolnonoa.

Sesoa ara himba pimba lopslahawol vev, kamba hev pusvundthoana moalamangnindrinielmba. Eva Yesus Kristusva himba kamba pusvundthoana hona andram, wo pimba hemba nengviluwuv, prolm, pim vuhe besallam sandhalm. Sesoa arapev eva Yesus Kristus yemba undalm vewol ehevra, eva beswonam wavra ehevhomnavra, wo yimba beswonam undwonam noinda avav.

**Polva Timotimba Omnana, Yeoa Moangakalamomoa  
Indhanakoklanamoa Tingesinvm.**

<sup>3</sup> Nemetva seilva pivva mongawulm ahana diva kotarava Evesusrava, wo yemba kava omnana, doa kava yemba dasvholahangav Masetonia provinsram. Kava os nengmanav yemba, os di avm Evesuskotara. Indhanamba monglava diva Evesusrava moangakalamona numhowol vewuv. Wo noinda osva yeoa di wohavm, ollawol vawovm no moangakalanindmoa. <sup>4</sup>Ishunvm, ata ombamora hevna nambaim pilpievm no moangakalamora, ten eishoraohvm, eva eindhununilnam simbehumunilnam, nom naengho vrinvm nihil. Honinda daosva angand vramana vev, wo snamba moamba engla pupul vrivmoa Sesoana andramba. Sesoana andrava viv undnahonara.

<sup>5</sup> Yeoa no indhanamoa ishunu, temba moangakalamona eishunvpa, heoa wuleihira, osm himba beswonam owalmba nesmos avramana vevra. Nengavnangva si henamba besal lovahinvra, wo si himba indkoklamba velmba ningvramoa, hevna undnamba velmba. Osva ningvramoa, kava doa indkoklava vina. Heoa Kristusmangas keknamoa undnahonam lovahmanavra, wo eva monglam indhanam und vowel vivra. <sup>6</sup> Monglava indhanamba doa pilalola ungu vena honaminiva. Wo himba moamba eishov seposam ambo, kellava sisiha vevmoa owainonoa. <sup>7</sup> Himba lovahalm vev lohohmona guruwolm, wo heva os himba hevpa tit viv, nomba temba hevpa eishovpa. Wo owaimomolva hevpa himba levrapieivnamoa, nomba hevpa eishovnamba. Eva hevpa nonorava avnamba, himba hevpa eva tit vivnata.

<sup>8</sup> Pivva nonora av, osva Sesoana lohohmomba besal, noi pinamba sahaposwomba ambarava velokusa vinv, pimba temba nonamba avpa.

<sup>9</sup> Piv vei, ningv, os lohohmomba vinnamoja besal indhanamangasva. Lohohmomba vinna wetat owl velm indhanam, nom he noi ten ovuvm lohohmom, eva hindm nom ten sambla undna lovahvm, nom lohohmom engalm. Memba indhanam, nom ten ahnam lovahwolv Sesoamongo sikulmera, eva nom ten engivm wevsakoklam, araravalm helvakomo vev, indhanam helvakomo vev, <sup>10</sup> ongariskui vikov, Sotomindna wevsam enginv, indhanam ehahnindm holvokomo vev ombandhana andranindilm, moangakalamom isholm, dasalm novtotholm isholm, wo eva noi manimani, hev ten vivm sahonam, indkokla vrelm Sesoana moam.

<sup>11</sup> Nomba moamba temba kleihalohvpa besal nemelmorava, noi Sesoaa ten kam vraohnam, ishomana vinilm. Nomba besalnemelmomba pimba ishunv, os Sesoava hevnakambara keknam av, hemangas mongalm okuliv.

### Polva Omnana Sesoam, Yimba Lehra.

<sup>12</sup> Kava omnav, os lehra, Kristus Yesusm pivna mendeklim, manara noinda, himba kamba os nonglav, lehra wohlohv, mana vemamba velmba. Wo himba kamba vraohna hevna andra, andra venalm hevm. Wo himba kamba hevna keknasowolva vraohvna. <sup>13</sup> Seilmba doarava kava indkokla vrevna Kristusmba, hena ungundrini kava lohvna, wo manimani sahonam kava vevna, hemba indkokla vrelmba. Wo heva os Sesoava kamba wavra vovhoamnana, manara noinda kava tit vevna nomba, osva ovna, os kava vev. Kava vevna nomba, nonam undnahonam kav lohm owai vevnam mendah. <sup>14</sup> Owai, mendekliva kamba undalm vrevna, wo noinda himba kamba kolvrana. Wo noinda kava daipotava hemba undnahonamba keknamba lohmanav, wo und vev hemba.

<sup>15</sup> Kristus Yesusva prona petharamba, lopshalm indhankoklam. Honamba moamba memba tanam, osm pethanindoa indkumbi wohvreivra keknam. Wo no indhanakoklava, ka men mongova, ka mindnamba indkokla vevna.

<sup>16</sup> Wo heva os kamsna doa wavra vovhoamnana. Kamba doa wavra vrena, wo noinda osva Kristus Yesusva himba nov wuleihinvra indhanakoklamoa, osm himba ambo taivwonam vinv indhanakoklamba, nomba temba hevna sahonamba lonwoh vrivnamba. Wo Kristusva kamba inethalm kevrana, osm indhanakoklaoa daha undnahonam amnavra Kristusmoa, wo no undna si eukwonamba wohavav yunalmiba. <sup>17</sup>Himba king kuwul yunalm wohalm, wohalm. Hemba dahavramoa, eva hemba novnamba nunglivramoa. Hengas mongasal Sesoanonoava, wo noinda osva elsusoa pioa hemoa okuluvmona velohra, himba senamininonoa wohav, tanamba.

**Polva Omnana Timotimba, Yeo Moanonoam Wohkek  
Vethavm, Wo Nona Monglam Indhanam Numhowol Vevm.**

<sup>18</sup> Timoti, yimba kana ombol nihilmsna lohv, wo kava hona moamba yemba pipramnav, osm yeoa wohvevm. Manara noinda nemetva Sesoana moalamangnindva himba mongawatilm ishumnivna yemba, himba yunalm wohvelokusa vivna moamba, yemba opusvundthueivna, uvna, hona monamangas Sesoava Timotimba undva nengmanav, engalmiba. Doa daipotava kava yem pevm henga ishomnav, yeoa no moam kek vetharava, nengvm. Os yimba si maim lohvra, ovra, valgonindrini daosmora bunevalgo ilohv, wo nona ungundm helvawol vev. Pinamba daosva besal Sesoaindamba.

<sup>19</sup> Wohviluwulkohao, undnahonam keknam alm, wo noi vevm, ten pev nonora lohvm, os ov, memba lehra. Monglava indhanamba honamba osva vivmoa. Henamba undnahonamba keknamba almba doa indkokla vipinna. <sup>20</sup>Himeneusiva Aleksandaiva os evena, wo kava doa hemba kihpiawolmanana Setanm, osm himba si di nowolva evravav, osm himba hengava sahamonamba ohomnavramoa Sesoamba.

**Polva Os Omnana Timotimba, Kristusnindoa Hona  
Monana Sesoamoa Sembayang Vewuvmonara.**

**2** <sup>1</sup>Minonoava kava ishomnav yemba, sembayang vinvm indhanamoa indkumbim. Sahmanavm Sesoamoa nomoa, nomba indhanamba und vivrava, wo osoa omnavm, os lehra. <sup>2</sup>Yeo sembayang vinvm king kuwulm, eva duang mendeklim, nom ten moalamang mendekli ilvhavm. Sembayang vinvm deuvnindna kuwulm, os pimba osva beswonam windewonam avra, sembayangm keknam kevrivra, wo longong vrivra Sesoam. <sup>3</sup>Honamba memba besal, honinda indva lothovra Sesoava, henoi ten pim lopshanam. <sup>4</sup>Sesoava indva vrinv, indhanamba indkumbimba hihil velm hevelmangas. Wo himba undva vrinv indkumbimba, osm levrapivolla moanonoamoa.

<sup>5</sup>Manara, noinda av mongalnonoa Sesoava. Wo mongasal monamba nomba, osva indhanamba diva pulvovra Sesoaindava. Nomba monamba

dihelgav Yesus Kristusnana, himba eva ambo indhanarinita. <sup>6</sup> Yesusva hevmba nih vithinna, dahalmba, pimba indkumbimba kilumb shuapralmba pivna sahaposworiniva. Wo osva Yesusindava osva ativra gavna, Sesoava und vowel vev, indhanamba indkumbimba lopshalmiba. Wo nomba nethalmiba nunglivna, nonamba Sesoava nengnamba. <sup>7</sup> Memba noinda kamba kikih vrena moalamangnindrielmiba. Kava tanam wohishov, kava moangakalava ovmoa. Kamba kikih vrena, numhowolalm Yutanindna meisungundm, undnahonam alm, eva levrapivolalm moanonoam.

<sup>8</sup> Kava ninginv, tendomba hi hi sembayang vewuvmonalm. Tendomba nomba himba nomba wulvongovongo vrevrava hevna englava sembayangdava, hevm besal indhanangas. Heva os sna indhanaoa owai, hemba lelnam wusprowol vev, moamba isholmba. <sup>9</sup> Mongova moamba kanamba men, ungevlioia pikianoa hevnalhrangas vevravra. Heoa hevm beswonam huhmohoia vrevra nengavnang besalna. Himba manam mindnamba hevna tana nihnamba huhmoh vowel vivra, nonamba seselnamba, wosnamba, kovnamba, eva golnamba, wo eva sna pikianamba, diva esvema lohmanavra, aembu, osmba ovra indhanana novoa noinda sembal vilunvra kaindaoa. <sup>10</sup> Wo heva os ungevlioia hevmoa huhmohoia vrevra, beswonam velm, hellelm Sesoana moanam andranam. Ungevliva nomba osva uvrrava, kava sembayang velvozmanav Sesoamba no moara, himba hevmba temba huhmoh vowel ovuv ambo.

<sup>11</sup> Ungevlioia hevmoa dembhapuv vevrava, mengmoa hevnamoa kulthoawol vivrava, Sesoana moamangas amnavra. <sup>12</sup> Kava ovunv ungevlimba, numhowolalmiba tendomba, eva tendorinimsnamba ovrelmba tendorinimba. Owai, heoa ambo tendona anglasingi euvmona vivra poaita. <sup>13</sup> Manara, Sesoava Atamsna miva vena, Ivmba sism vena. <sup>14</sup> Wo Atamba Setanna newondmomba hellenamoia, owai, Setanna moamba Iv hellenamba, wohvena nomba indkoklava. <sup>15</sup> Wo ungevli si otolva tetwond vevra, wo himba osva vivrava, keknam undnahonam avra, nesmos avramana vevra monglamoa, engivra besal wevsam, nonam beswonamangas avra. Himba honamba vivrava, Sesoava si hemba lopshavav.

### Kristusnindna Kuwul, Es Hevpa Himba Si Avav?

**3** <sup>1</sup> Tanamolnam, himba nomba Kristusnindna kuwulalmba loholmba vevrava, doa himba doara andrava besalmba nengna velmba. <sup>2</sup> Wo nomba indhanariniva kuwulalmba loholmba vevrava, besalangas, snal henamba doarava mana vemava sahoklalva lohvnamoa owai. Wo heoa eva mongawa onganangas, samblava owai. Wo heoa hevm indhohlalangas, snal alm, beswonam besal wevsam temuram engalm. Hemoa longong vrivra indhanaoa, wo eva hevna deuvraoa indhanamoia

ilomoa wolasiha vevra. Heoa besal guru lohvra, Sesoana moanam numhowolalm. <sup>3</sup>Himba manam mindnamba wainmba nevra, wo himba sna indhanariniva owai, daosmangas vev. Heoa ambo mindilmsna amana vevra. Manam himba dimba und vevra.

<sup>4</sup>Heoa besal kuwul wulluhunvra hevna ongatowondalmoa, wo osva hevna otolva ata beswonam engivra hemba keknam. <sup>5</sup>Manara, tendoriniva tit vetava, kuwulva wulluhunilmba hevna ongatowondalmba, himba eva osva pelthasambahavavta, Kristusnindmba kuwulva wulluhunilmba. <sup>6</sup>Nemel Kristusnindriniva manam kuwulalmba olohvav. Nemelva ata ambo hevm innetesna vrelm ovov. Wo Sesoava hemba si wetatmora lesvhoawol vevav, os ten Setanm venanam. <sup>7</sup>Wo no Kristusnindna kuwuloa, heoa sna indhanarinim, indhana mongla hemba longong ovrivra, puehalnind, hevpa Kristusnindva owai. Wo hemba nevoskamonamba ishumnivramoa, wo verava, Setanna pohlalawondara himba sihavavmoa.

**Polva Omnana Timotimba, Kokoldombnindva Nomba  
Kristusnindnamba, Es Hevpa Himba Si Avra?**

<sup>8</sup>Eva mongawatovna osta kokoldombnindmba, no indhanarinimba indhanamba hemba longong vrivra. Himba samblamonamba vilovavmoa. Himba manam mindnamba nambaiva pilpiavra, nawolmba wainpolva, wo heoa snaoa owai, di manimani nis ambo yiskomeinvra indhananamba. <sup>9</sup>Heoa hevmoa helmhola vewol vivra, os kamba mana vemava kethawol vevmoa sahoklalva. Heoa no besal nemelmona wohavra, noi ten Sesoa ambaram wulphunnam pim indkumbim hevtindim. <sup>10</sup>Yeoa hemoa boasna lehnong vivm seilmoa, wo osoa heoa andra vivra kokoldombnindilmoa.

<sup>11</sup>Eva hena ongahumuniloa osta, indhanaoa hemoa longong vewol vivra. Heoa sna ungevlioia, owai, himba owalmba ishunvra nevoskamonamba. Heoa beswonamangas vivra, wo ungevlinonowolm nunglivna, osva manara manara. <sup>12</sup>Kokoldombnindoa mongawa onganangas lovhvra. Wo heoa besal luhunvra kuwul hevna ongatowondalnaoa. <sup>13</sup>Wo himba nomba temba andra vivpa beswonamba kokoldombnindilmba, wo henamba nihilva si beswonam luhunvra. Himba si pepehva vivramoa, moakus olmba, osva kava undnahonam lovhamanav Yesus Kristusmba.

**Polva Omnana Timotimba, Pivva Sesoatindiva  
Tanamangas, Manara, Pivva Moanonoa Wulvahvpa.**

<sup>14</sup>Kava nengvna, prolm lelnam, yem nonglalm. Wo heva os men ambo kava tombaira manimani venav yemba. <sup>15</sup>Wo noinda osva kava lelnamba prolmiba owai vetava yeindamba, yimba si levrapivolvav manam manam

hona tombaimomba, pivva indhanamba si vivra Sesoatindiva. Pimba Kristusnindva memba Sesoanonoana, ten wohavm. Pimba Sesoanindva hovmundilmsna, eva milukulmsna av. Wo hena moamba piinda plotholuhunv. <sup>16</sup> Yimba puerati vretava, pivna undva sembayangnamba mendeklielm.

Himba doa indhanarinielm nilhana, pimba doa nunglina hemba. Sesoasongolla osva liheina, henamba wevsava tanamolnamangas, wo nunglina ovsongolnindva.

Wo hena moanamba annindm annindm os numhowol vewuvmona vevna, nom Yutanindna meisungundm.

Wo pethanindva hemba keknam undnahonam amnavna, wo Sesoa waivongana senamba, wo nihilva himba mendekliva vravna.

**Polva Omnana Timotimba, Indhanana Nengavnangmba  
Moakokomoa Wera Vewol Vinvna.**

**4** <sup>1</sup>Sesoasongolva doa bamanbam moakus ona, osva si sewonamba monglava indhanamba pelmai vethakovvav, tanamba undnahonamba almaba. Himba si patvunvra tihsongokoklam, daswoposwonindm, wo si enginvra henam moam. <sup>2</sup>Sna moamba prunv tetohluhulnindna, himba osva hevmba naengho vewol vivavmoa. Noinda osra, himba osva vivmoa, kava mendah sahonam av. <sup>3</sup>Himba os eishunv indhanamba, owai, indkokla vev, ongamba dombolmba. Wo eva hev vev, eishunv indhanam, ov, innemba monglava manam yimba nomba hlavra, aembu. Heva os owai, Sesoa nomba innemba vena, wo indhanamba nomba keknamba amnavpa Sesoamba, wo himba nomba levrapivolvpva moanonoamba, hlavm nooa inneoa, wo osoa Sesoamoa os umnivm, yimba lehra.

<sup>4</sup> Manara noinda manimani memba Sesoava venamba besalangas. Mana vemava sahoklalva Sesoava venamo ombamba owai, heva os pioa honindaoa Sesoamoa os olomanara, lehra. <sup>5</sup>Manimani memba Sesoava venamba, pina mengnanalm vinna, nona vena, hevna moana, eva pina sembayangna.

**Polva Omnana Timotimba, Yeoa Besal  
Andranindrinielm Loho Kristusna.**

<sup>6</sup>Ishunu honaoa manam manam pivna mongawa Kristusnindmoa. Honinda si osva nunglivav, yimba besal andranindrini lohv Yesus Kristusnamba. Yimba si inetha vrevra pevmba, osm yemba doa pelapipiha vena, undnahonamba loholmba, eva moam besalm, nom pev ten engvnam. <sup>7</sup>Indhanamba moashopushova sahoklalva ovrrava, nomba temba mongawulmba loholmba owai evevpa Sesoana moanonoaiva. Yeva

kelaiho, ka petheini no moashopushokoklara, aembu. Yeoa pevm ambo numha vrevm, Sesoamangas andra venalm. <sup>8</sup>Hello, pimba dandwonamba angallava, tovolva pinamba si noinda engangu vinvra nihmerava, wo honi pimba si kolvwrowol vevav. Heva os pivva pivmba Sesoana moanamba numha vrellava, osmba piindaoa mindnam suwemsna tavrakiliheinda, honi pimba si mindnamba lopshavav, men hona wevsana piv men avm. Eva noi pimba si mindnamba wohlopshavav, nonamba wohalmba sewonamba. <sup>9</sup>Memba honamba kava ishovpa, memba tanam, wo yeoa keknam wohvrangas veo.

<sup>10</sup>Pimba Sesoam nengviluwuv, nom velm, hev ten onam, henoi ten wohavm yunalm. Himba woheinv lopshalnindrini indkumbina, heva os himba pimba lopshav, memba pimba hemba undnahonamba amnavpa. Pimba hemba nengviluwuv, noinda pimba keknam kelva tuweilv hena andrarava, kinmba lopsho avramana vev. <sup>11</sup>Ishunvm, eva numhowol vevm, ten pevm kav ishomnaim seilm.

<sup>12</sup>Yimba mendah ereworal tendotowond, heva os manam yimba mongomba nihva wuleihamnavav, yemba sahonamba ovralmba, osva ora, owai, mani mendeklilm lohvma. Vinu, inethalm, nunglira, keknam undnahonam ten avm, osm os ara heoa. Numlahawol vinvm hemoa pevna moana, pev ten lohvm, pevna nesmos undna, pevna undnahonana, eva pevna no wevsana, ten pev besalangas lohvm Sesoana novra. <sup>13</sup>Ambo yeoa osangas boaita uwunvm Sesoana doaramini tombaimoaoa indhanamo. Kepel vovhoawol velm hem, eva numhowol vevm. Yunalm honaoa osangas wohvawovm, verava, ka yem nonglaphora. <sup>14</sup>Nengvm nom moainal andra, ten Sesoa pevm vraohnam. Nomba moainal andrava yemba doa vraohna, nonamba Kristusnindna kuwul hevna engla yeinda huhlivnam.

<sup>15</sup>Wohvawovm honaoa osangas. Pevmoa nihnahonam wohhilvraho, honamo. Wo indhanamba indkumbiva osva si nunglivra nomba yena andramba, ora lehra phomnav. <sup>16</sup>Ambo temura beswonam novnovhora pevna andraoa vevm. Osangas beswonam avrava, beswonam numhowol vawovm. Osva Sesooava si yemba kilumb shuavav, eva no indhanam, ten yem hellelvohvm.

### Lohohmomba Men Lohv, Kristusnindmongova Aevulalmba.

**5** <sup>1</sup>Timoti, manam yimba vevandnamba wuspronambu ishunvra mundkolavoklamba, ambo hemoa moaivrawonam ishunvm, os ovra, pevna arapevm. Wo eva tendotowondmoa os nesmos vowel vevm, ten pev nesmos vowel velohvm pevna towandaslapewm. <sup>2</sup>Popeng vowel vevm ongakolavoklamo, os ten pev venavm pevna avapevnihilm, ongamalongomoa os ovra, pevna muskopevnihilm. Osangas no wevsana wohpopeng vowel vevm.

<sup>3</sup>Popeng vewol vivm peliongomoa, nomoa temba eungu vevpa aiv.

<sup>4</sup>Wo peliongova ototalnamba atava, o muiangombundilmba wonatava, seiloa heoa boasna wiya vreira hevna andram. Hena andrava luhunvra, hevna ongalm popeng vewolalm. Nomba himba osva virava, himba si henga sesmba araravalnamba ongalnamba vinvra. Honindava osrava Sesoava und lothov. <sup>5</sup>Mongova peliva atava, osva mana vemanamba onunglivramoa hemba, wo himba Sesoamba sembayangmba ambo lotholohmanavra sia okomba, osm kamoa kolvravra heoa.

<sup>6</sup>Wo peliva mongova hevmба deisil vrelohma na vetava, osmba ora, honinda kamoa kanandhara, heva os owai, wavrapeto, hemba doa wohdahana, memba mendahva daipotava avpa. <sup>7</sup>Ishunu dioa Kristusnindmoa, honamo vinilmoa peliongomoa, osm ata mongo os ovov, yimba sahonam viv temba. <sup>8</sup>Henooa heva hevna aratindim popeng vewol vevra, eva hevna ongatowondalm. Nomba himba osva owai vetava, himba doa osva wohnombolvhoai, undnahonamba Sesoamba keknamba loholmba. Hemba doa wohindkokla vena sna indhanarinimsna, ten henoi keknam lohmanam owai venavm Sesoamba.

<sup>9</sup>No tombairaoa, temba peliongona nihilva noindava lohginvpa, ungevlioaa nooa snal, doa tahonmba henamba 60pelara lohmanavra, eva mavu mundkolalnonoa. Wo heoa sna, tlalva henamba mongal lohna.

<sup>10</sup>Eva hev vera, nunglivra, os ungevliriniva andrava besal vevna. Men honi vevra, himba otovtalm numhowol velm hevnam, ilom wolasiha velm hevna deuvram, innem dahlwalm, Kristusnindnam pethamonglam ponam poswol vinilm, kolvrowol velm nom, ov, henonamba kin lohv, eva nom manimani besal andramangasm velm.

<sup>11</sup>Wo heva os yimba manam ongamlongo pelina nihilva tombairava vewol vinvav. Manara, seilmba himba Kristusmangas amnavna, wo hengava himba sismba Kristusmba pewoleihivrava, tlam atawulungu vevra. <sup>12</sup>Wo hemba si lesvhoawol vivra, nona ten seilm hev doara ongawola leihinnam, wo heva os himba maivithivna. <sup>13</sup>Wo hev vei, nambaiva ombam ambo hevnamba pilpieuvmona vev, no deuvra vivpa, no deuvra. Himba manam oningvhuvna owai, ku anisvra vevnamba, ungevli owlom tendom hem eishomana vinvra. Himba moamba sna eishovna, owai, yuhlamohla vevna, wo heva os owai, himba manam snamba moamba eishovra.

<sup>14</sup>Wo os kava nengv, ongamlongooa pelioa vongolohwolla tlara, tetwond vera otolm, wo hen ihevna manam manam deuvm nom popeng vewol vivm he. Himba honamba osva vetava, wo an eva si mana vemanawusrava nevoskamonamba ishunvra hemba. <sup>15</sup>Heva os monglava ongamlongova peliva doa doara tovopethamnana Setanm.

<sup>16</sup>Mongova ungevliriniva doa keknam amnavra Kristusm, wo hetindiriniva mongova avra peli, wo henooa hev no peliongomoa nihra

vrevra, indkumbiva Kristusnindva owai. Indkumbiva Kristusnindva nomangas, ten os doa doara henamba snal snal wohsihapiana, mongova avmoa mendahva.

**Kristusnindna Kuwuloa Dioa Mindnam Dumbvra.**

<sup>17</sup>Nomba temba kuwulva beswonamba andra vivpa, heoa mendekli dumbvra dioa. Monglava himba ehlana wohandra viv, vev, eishunvm, eva numhowol vivm, wo noinda osva henonaoa mendekli koholuhunda.

<sup>18</sup>Manara noinda, Sesoana doaramini tombaimorava os novol velohv,  
Nonamba sapiva tith vowel vevrava witva osorava, manam yimba  
mengmba kulthueimnivav, nonapenamba, ata homeis nevm,  
aembu.

*Lo 25:4*

Wo Sesoana tombaimora vei, os novol velohv,

Andranindoa dioa dumbvra hevna andraraaoa.

*Luk 10:7*

<sup>19</sup>Manam yimba mongomba indhanarinimba hillivav, osva otava,  
kuwulva sahonam vev, aembu. Heva verava, mavala sambla indhana,  
mavala samblamong indhana, himba osva utava, tanam sahonam vevnata.

<sup>20</sup>Ishunu nomoa temba mendahva sahonamba nisva vivpa, osva himba  
sahonam viv. Honaoa veo di indkumbi Kristusnindna novra musera, osm  
ata kuwul ovalva di noinda angawola ovra hevmbo.

<sup>21</sup>Hona indhanana novra, vei, Sesoa hev, Yesus Kristus, eva  
ovsongolnind, noi ten Sesoa kikih vrowol venam, kava wohomnav yemba,  
vinilm honam kuwulm. Ambo novnovhora yimba vevrava, manam yimba  
kuwulm owapevmangasva vinvra, aembu, indkumbim vinvm. <sup>22</sup>Boasnna  
keknam nengo, ata yem lelnam eisvav, englam holotholm, mendeklim  
andra venalm. Ata kuwulna wevsakokla yem pavralovm homeis. Yeo  
pevmoa naengho vromana vevm, besalalmangasm loholm.

<sup>23</sup>Timoti, memba yem pevm, manam yimba pongasva nawovav,  
wainpolpetanahonam nawo. Noinda ten pevm eravuvul velohmanavm,  
noi nerava, wo si osva yimba beswonam avra.

<sup>24</sup>Monglanamba indhananamba indkoklamba ambara ambo nungeilinv,  
eva wetatmorava hemba wonishuvra. Wo heva os mongnindnamba  
nungeilinvav indkoklamba sisimba. <sup>25</sup>Wo eva ambo osangasta, wevsam  
besalva poaitava kethalohvmoa. Wo heva os eva nonamba himba  
nonglalmba saha vrivrava, himba osva avavmoa puehahnindilmba.

**Polva Omnana Timotimba, Kristusnindva Himba Nomba  
Ombandhana Andranindilmba Avrava, Heoa Besal  
Wevsam Engivrava, Hevna Kuwulmangas Hilwilvra.**

**6** <sup>1</sup>Indkumbiva himba nomba temba ombandhana andranindilmba  
avpa, heoa mindnam longong avramana vevra hevna kuwulmoa.

Wo anvema ata ishovra sahonam, indkokla ovrelm Sesoana nihilma eva moam. <sup>2</sup>Mongla ombandhana andranindna kuwulva lovahinv, wo himba Kristusnind. Wo memba honamba osm, himba etemboslanamsna vilowolv. Wo heva os ombandhana andranindva manam ombamba sleiv vrivav, popeng vowelalmba hevna kuwulmba. Heoa mindnam beswonamangas andra vildeinvra, manara noinda himba kolvwol viv Kristusnindm, nom ten hev etemboslamsna ahawolv. Heoa eukho vevra hemoa.

Manimani memba kava yemba honanamba memba wulavpa, yeoa honana vevm, numhowol vevm, eva ishunvm.

#### **Polva Omnana Timotimba, Gurudaspolva Kelsombovhol Av.**

<sup>3</sup>Osya vetava, vevra, mongova indamona numhowol vevra, himba owai vevra moanonoanamba mendekli Yesus Kristusnamba. Wo nomba moamba hemba ambara vethamnav moanonoam Sesoaindam.

<sup>4</sup>Indhanariniva nomba temba moangakalamonamba numhowol vevnamba, ambo hevm dasalm wulvongavna, himba mana vemava owaimomolva eskandva kolaihanamoia. Himba nengavnangkoklana olohv, nom daosm eva mana vemana wusra. Wo noinda wusapramana vevna, os velohvna, os velohvna, daswot lohvnama, eva Setanna wevolm. <sup>5</sup>Wo no indhanana daosmom otuhtinvna, ten keknam Setanna nengavnangna avnam. Noinda himba doa doara moanonoamba pelmai vethakovna. Henamba nengavnangva os luhunvna, andra venalmба Sesoamba, osm monamba pilgav, samsangram plotholoholm hom daipotam.

<sup>6</sup>Membu tanam, osva andra venalmба Sesoamba, yimba si samsangra plotholohvav, yimba osva vetava, manam manam wohpelmai vethavra, henamangas lohmanavra. <sup>7</sup>Nonamba avamba pimba tetwond vevpa, mana vemava pimba iamb vevmoa englanamba homba petharamba. Wo eva nonamba pimba dalvpa, mana vemava pimba guvravmoa nihrava, owainonoa. <sup>8</sup>Wo pimba honatnamba allava innena wohna, pioa os olohra, pikowo doa manam eva seihvav hengava.

<sup>9</sup>Himba nomba temba hevmba samsengramba pelhola velmba vivpa, himba ambo hevm indkokla vowel viv. Himba doa Setanna pohlalawondamera saivna. Wo doa himba mana vemam undva nom viv sahoklalm, noi si hevm indkokla vowel vevavm, mana vemakokla noi indhanam indkokla vowel vevm. <sup>10</sup>Manimani sahoklalva wevsava dira phov, mindnamba dimangas amnavm. Indhanamba doa owilihina, keknamba undnahonamba almba, manara noinda himba ningv, esvemam dimangas dombolm. Heva os wavrapeto, heva hevelm ambo aiv vivna, nihsesowolm.

#### **Monglava Mana Vemava, Men Hengamba Nengvhoalmba.**

<sup>11</sup>Heva os yimba Sesoatindirini av, yeoa meis haravhoamno no wevsamoa. Beswonamangasm alm lehvm, andra venalm Sesoam, keknam

undnahonam amnalm, und vowel velm, eva moakoklamorava ambo lo bombothovm, taivwonam ambo novnovhora vevm. <sup>12</sup>Osangas keknam wohkevro, undnahonam loholm, os maim ora, dandwonam avlavramana velm vev. Keknam ehlana alahmana vevm, verava, ora, henoi phov miva. Nona vivm, undva yimba doa dumbna, nonapopolm yunalmba almiba. Yemba doa kekaiv vena, hona undnam alm. Wo yimba doa moakus unna musera tanamba mindnam Kristusomba, osm indkumbiva ahalovna.

<sup>13</sup>Sesoava daswolv vavatanmba nom manam manam, wo hena novra kava yemba ishomnav moamba. Eva osoa Yesus Kristusna novra, himba nomba temba moanonoamba moakus unna, nonam hev Pontius Pailatna novra ishovnam. Men kava yemba ishomnav, <sup>14</sup>vevm manimani, nooa temba yemba wuhtinamba, velmba. Ambo moahui vaomana vevm, verava, hev Yesus Kristus pivna mendekli provavm henga. <sup>15</sup>Sesoava si os ambarava hulvundthoavav hemba, nonam nambainonoa phovram. Hengas moalamangva wulav, hemangas okuliv. Hengas king kuwulva wuleinv king kuwulnamba, eva mendekliva luhunv mendeklinamba.

<sup>16</sup>Sesoamangasva dahavavmoa. Himba sna pusambanakambara av, owai, novpa sowaiwwol vev, es eva indhanariniva diva sihavav murapetava. Mongova doava owaimomolva indhanariniva nonglanamoa Sesoamba, nonglavmoa hemba. Keknam longong vrivm Sesoamoa elsusoa osangas.

<sup>17</sup>Ishunvm hona moaoa no indhanamo, temba osva avpa, manam eva seihvav honamba petharinimba. Ata hevm wivewol ovuvra. Ishunvm, keknam amnalm Sesoam, hevna dimba owai, yemba daswotv detimangas. Dimba manam keknamba amnavra, manara, Sesoa pinamba manimani ieinv. He pimba daswolv nomba manimani, pimba nonapopolva undva lothopravpa. <sup>18</sup>Ishunvm no sambsgennindmoa, beswonam velm. Ishunvm, osm undwonam avra, among vinilm, osm hemba nomba heva hevna. Wo noinda osva himba hevm ovra, kakowa lehrangas lohv, nonamba among vevrava. <sup>19</sup>Nomba osva vetava, himba si huhmohva kokolma vildavra hevmba diva senakembellava. Wo nomba huhmohva henamba boalgalmsna keknam wosaluhunvra. Wo henamba sewonamba undmba si kelsowol vilunvra noinda huhmohra. Wo osva himba si avra no undna, ten noi tanam und lohvm.

<sup>20</sup>Timoti, Sesoava doa hevna andrava yeinda holothona. Yeoa beswonam muhulkoho, ata ye sahonam kohosihavav indamonam. Ehalla vinvm no indhananapenamo, temba nomba eisholohmana vevpa moangakalamomba, Sesoanaminiva owai. Ehalla vinvm henonapenamo, temba ohowolvp moanonoamba. Himba nona moapopo uv, os ningthiv, nowol, wo heva os memba nowolnonoava owai. <sup>21</sup>Himba os eishov, kava no nowolna av, wo heva os himba doa maivetakovna nomba moanonoamba. Sesoaoa yemoa wavra vovhueinvra.